

新會縣志卷三

知縣林星章主修

香山黃培芳

總纂

南海曾釗

建置第三

上

城池

公署

學校

何朝昌分纂

新會縣志卷三

建置

上

城池

礮臺附見

新會古未有城

方輿紀要新會治新夷廢縣

元季俶擾主簿徐聞可始築

垣備寇黃斌作亂破之邑復爲墟明洪武十七年邑人岑得

才請置千戶所及城池是年開設都指揮王臻領兵一千立

柵鎮守二十四年始築土城外環以池三十年千戶宋斌始

砌甃石周圍五里是爲舊城天順六年西寇焚掠郭外居民

知縣陶魯始築子城內設馬路外鑿重濠外又築竹基重塹

次年寇至卒莫敢犯城周一千六百八十八丈高一丈二尺

外濠二千一百二十五丈深一丈五尺闊二丈二尺濠外竹

基二千五百八十七丈基外重塹三千一百六十八丈深八

尺城門樓四敵樓四警舖三十一雉堞二千四百爲門有四

陳獻章子城記自人一身以及天下之守莫不有藩籬焉是故身之守禮義是也國之守綱紀是也關要之守城郭是也藩籬之所在賢者慎而修之身以善其言行修之國以善其政令修之關要以保其土地人民其用不同以是爲用之急而盡心焉一也昔者西寇之來今憲副鬱林陶公始爲丞於我邑當是時賊剽掠高涼以東千里無完城民枕籍死道路遠近觸體相望卒無可供賦求者吾邑故饒裕雖當剽掠之餘亡者僅有一由是東掠之寇爭倍道以圖我望山川而朶頤公晝不遑食夜不解甲躬率子弟閉關塞要以待賊之必至而謀蠶之萬不失一賊遂卻民喜恃公以爲固公曰未也孤城當賊騎之衝我恃勢而忘備藩籬不脩非萬全計乃以眾謀環郭更以牡蠣爲重垣而守之邑地南盡於海西南爲廣海衛兩城相望爲唇齒中間烽火之警南北恃以爲備其輕重之勢等爾掌衛指揮周侯吳修戰守之具以與強寇從事而城以克完寇退謂人曰邑之戰孰與衛之危衛之守不如邑之固邑有輔城衛無之會欽差總督兩廣軍務御史韓公移檄各衛所通作木柵爲重垣以備西寇侯喜曰我志也詣憲副公議事環衛城一千丈木長短小大如式較於磚之費廉而能久遂定議以磚易木侯退領其事材具於邑力辦於衛經始於成化甲午訖工於戊戌凡五年而藩籬之設衛與邑等而又過之合蓋柵之嶮城易搖不若磚之永固也衛人感侯之用心侯不自有欲歸其功於上之人而懼後之人

我遺來乞記於白沙陳獻章告之曰關要之守在藩籬則用心於藩籬矣亦知志於手足之用乎予聞之無事而物物得其所以折千里之衝之謂整有事而能以逸待勞以實擊虛彼又不足而我有之謂之暇夫惟整故能暇整與暇守之志也藩籬其守是侯之先務在志乎哉侯曰唯並書以爲記

正德十一年知縣徐乾修復

延袤一千七百丈高八尺濠塹馬道一如陶魯之舊

湛若水記畧正

德丙子三月甲午新邑尹臨桂徐侯乾健夫復子城越二月告成延袤一千七百丈高八尺城山水各因其地爲外濠爲內馬道爲門爲鋪爲水閘稱之凡因壯蠲之事若干木石之事若干是役也費出而官不與功成而民不勞初侯蒞邑之三年覽地圖而歎曰嗟乎美哉山河之勝北有圭峯南有厘山東有江門西有金牛後連高涼廣右之區前通高雷海島之船故有備則爲我之險矣無備則爲彼之衝矣文學諸生林紹光等進曰昔我方伯陶公魯方承是邑懲西賊焚燬之慘圖諸白沙先生而子城肇建民稱賴以拒賊明公其有意於復乎侯謂劉大行文瑞曰今子城古之郭也郭以輔城城以輔民故郭不修斯無城矣城不固斯無民矣無民者謂之虐無城者謂之危危與虐其何以爲民之父母吾將復矣或曰其遺址久奪於豪右則若之何侯曰豪右之奪利其地也棄城與賊妻子不保其何地之利或曰其瀕江狃於市民則若之何侯曰市民之安之逐其利也棄城與賊身且不保其何利之狃是故一令而民從矣於是鄭戶曹銘曰保障有眾

其在茲乎施縣尹用曰萬方之防其在茲乎涂侍御敬曰侯之功德其在茲乎故無輔城則舉城外之民而棄之矣侯之保民如子也其在此也史若水聞之曰諸君之說誠然矣然如輔城外之民其將何賴不亦舉而棄之乎故吾聞之大夫以四境爲郭諸侯以四國爲郭天子以四夷爲郭以四夷爲郭者天下無棄民矣以四隣爲郭者舉國無棄民矣是故君子忠以爲金湯禮以爲雉堞義以爲樓櫓道德以爲關鑰與民修之與民守之固以勿壞是以謂無棄民之道也李推官江與余鄭諸君曰盛事也不可以不紀守千戶所苑君忠曰紀之將以告於嗣守茲土者謀諸葉貢士尙輦來謁又明年季夏新丞周君濟速邑人何侃以鐫事請遂著於石

參黃通志阮通志

其後萬厯元年六月兵

備僉事何子明知縣伍睿鄉官彭漢陳吾德林大章黃淳許大之許欽文等公議量力鳩工上者至四十丈下者五丈又以寺田之價計畝之徵及城中間架助工周九百六十丈高一丈八尺是爲新城初修外城時鄉官陶益捐築二十丈彭漢十二丈李果十丈鄉民蔣耀先四十丈張思豫蔣茂卿各十九丈六尺謝崇秩十二丈六尺劉汝大十一丈許舜選十

七丈七尺潘伯殷十丈儒官陳業築騎虎關生員施仁容愈
大容舒築泗水門餘數丈數尺者不具載萬厯三十五年知
縣王命璿謂城北一帶野曠民稀睥睨低薄別無重城輔衛
乃東自馬山西自舊城計三百丈益以磚石增高三尺崇禎
十三年城塌一十餘所計百餘丈知縣李光熙修國朝順
治四年內外城增高三尺十一年又增建礮臺敵樓五座賈志
道光三年署縣吳毓鈞修紳士何朝彥李實伍有庸戴鶴齡
譚興相莫汝舟黃殿槐等督理十三年東城樓圯復塌馬山
南門西門三處城牆計四十餘丈窩舖半皆頽廢道光十八
年知縣林星章捐廉重修紳士譚興然何朝昌黃肇彰何承
佑黃震亨張懋相倡捐董理平惠民門外路百餘丈採訪知縣
林星章記外城週環一千六百八十八丈東接馬山西跨象山延袤逶迤崇屹鞏固較他邑尤稱最焉而承平既久日就

燕圯昔所謂雄制一方控扼居海諸險者幾委頓矣道光戊戌四月予與眾紳士以城濠既濬復為修城之舉所有頽垣馬山嘴庇民門等處計四十餘丈窩舖二十餘間東門城樓與各城門之應建修者雇工計料就次繕修自四月至九月落成予與邑人士樂游其間見夫城垣完固樓櫓周備而東城之樓巍然翼然瞰山望海鬱為大觀撫合邑之眾時和年豐民物殷富誠足樂也眾請顏其樓曰海甸春和誌其盛也或曰茲城築自前明城非不堅而倭賊山匪時相陵犯邊圉日急我國朝偃武修文不事金湯為固而民安樂業威鎮海疆則大化所被不在夫城之修與不修也然而眾志成城者教化之行也鑿池築城者守土之責也我皇上嚴鎖鑰之防凡有城垣皆准請動項修葺亦兵可百年不用不可一日不備之意也乎既撫此土稚此民使不為土地人民之計而任其頽然傾圯若罔念聞豈理也哉又安能不思患預防而與邑之人共其籌度耶時董理紳士則譚興然何朝昌專督其成而黃肇彰何承佑黃震亨張懋相亦與于襄理焉

按新會故城西北跨西山東跨馬山周五里凡六百六十八丈高一丈九尺厚如之東西南北為門四各有樓櫓高一丈東西角樓二座城上窩舖凡十有一

外環以池水門三曰西水關北水關南水關其池一千六百八十丈闊三丈深七尺環城東而南至西其西北乾塹半之新會新城東接馬山西跨象山舊西門延袤九百六十丈厚一丈高一丈八尺爲大門三南曰鎮海東曰賓升西曰寶成各有樓櫓便門四南曰知政東曰泗水西曰庇民又西曰惠民城上敵樓礮臺八座塼一千四百四十五水門三東曰騎虎關南曰清化關西南曰五顯關小水門二西曰隆興關

卽惠民門下水關

南曰小富涌關新舊兩城周圍計十里零

一百五十七丈粵東城之大者自省會外潮郡爲大次則新會他郡縣皆不及內外城共十一門其街巷

名目亦多倣照省城云

新城之南面有河卽城濠也東自大悅濬汎起西至鴨漡涌
止直長一千八百五十六丈年久未濬易形淤淺而遶城一
帶兩岸居民舖戶又多侵佔故河道狹窄商民胥病乾隆五
年城內被水淹浸倡捐濬修內河按內河指城內小河適縣屬大鼃沙
有新生坦約百頃陳姓族人願捐四千金爲修外河按外河指城濠
費署縣王植力爲具詳獲奉批准興工推區有鳳莫之端謝
名時聶者輔劉洪憲何璋蘇枚許成連李元標九人督理河
面闊五丈河底闊二丈五尺深五尺秋濬春罷至乾隆十三
年四月工竣合邑士民復以水自江門來只分半入縣沿岸
有禮樂不涖涌大濬營前又分蔣板媒人洲二涌皆分流出
海到城之水無多署縣汪宗澧爲築壩營前使江門水盡到
縣以資其陶洗刷蕩積淤都會淺一段係坑中沖沙所積自

都會至西墩計五六里皆被淤塞濬通後因築壩於淺口堵其坑水以免沖沙積淤乾隆十一年該村生員黎定國以村民舟楫進城頗遠情願自備工費濬深伊村前內河請開此壩署縣周懷濟勘明著定國等將村前河挑深三尺仍築壩於村右沖口上填石板使水至則從壩上滾溢水淺則蓄於壩內擋塞沙石永杜填塞官河之患其商民舖尾竹木堆積搭蓋浮欄有礙河道者除去諱日久都會沙壩壞大濬營之壩亦廢淤塞如前道光五年署縣陽耀祖修濬以經費不敷停止道光十八年知縣林星章捐廉爲倡以職員譚興然舉人羅鳴鑾黃丕基附貢何朝昌監生張佩玉等倡捐舉事不數日經費雲集估價動工知縣林星章先定程式自大悅濬至接官亭七百餘丈爲一段東方紳士羅鳴鑾唐仁陳冠陳

經等治之自接官亭至西一千一百餘丈爲一段本城與西
方紳士譚興然何朝昌黃肇彰黃丕基張佩玉黃震亨廖安
陳占元林朝楨張懋相梁英忠何承佑等治之二月初四日
築壩開鑿深以三尺五寸爲率凡兩閱月告成其大悅浚壩
都會沙壩之宜築及所鑿河坵堆壓民田之宜去者則譚興
然何朝昌專任其事而副之以例貢李炳麟自是水由江門
來者可以灌溉內河都會之沙坵不得擁塞河道兩岸浮欄
步頭不得佔築其鋪尾相對處各丈量豎記河面闊處五六
丈狹者亦四丈五尺河底闊處三丈狹者亦二丈五尺民旣
樂業工不虛糜環城河道庶有賴焉

採訪冊

知縣林星章

記會邑城濠二千一百

餘丈澤國通衢也西接江門之水入大悅濠南接厓門之水
入沿濠並滙於縣治之南國朝乾隆初年王署令以淤淺
濬修稱一時盛事今將百年西濠屢至闕積尤甚而民居瀕
海者又爭爲佔築舟楫遂以候潮爲難道光五年動工興修

以虛糜未成予初蒞茲土卽訪求民瘼因知其事遂先捐銀叁百兩爲之倡並集邑紳勸簽不數日經費雲集於是定其程式先挑瓦礫繼乃築壩開整分其地段以紳士譚興然何朝昌等治其中以羅鳴鑾陳冠等治其東以張佩玉黃丕基等治其西是時二月初四日也入春已深土壩防雨尅日計工晝夜不輟予公餘之暇卽至其地指畫形勢俾得速成則不虛糜功有實効遂於四月初五日工竣開壩天乃大雨入謀亦神助也而疏濬雖施善後有待大悅濬之壩不築則西流不入縣治脈絡不通都會之壩不修則沙泥易淤東道全河必壅且沿河之田沙泥疊積有傷民稼皆當剷除予復爲籌款以譚興然何朝昌兼總其成週年之間涸者濬之弁者廓之坭之壓田者除之岸之崩陷者修之石礪之阻流者鋤之木欄之佔據者毀之未期年大告厥成夫是役也始莫不畏其難繼莫不喜其易而經費有節遲速殊形則神庇之默佑經理之勤勞與邑人之捐輸者皆不容沒也謹書於石以記其事焉

按城內之水關三曰五顯曰清化曰騎虎皆山潦流注之區而騎虎尤甚圭峯諸山之水跨文溪流出西門諸山亦沿惠民門廠邊入大濟橋來會其地勢較全城尤低陂塘爲多甚難築壩卽不雨無潦而關內

之水每日平添尺餘數日則溢出壩外惟以竹筧十餘穿壩渡水過河庶可以洩其勢而功有成大濟橋口一段有石名蟹珠不可傷中有水源難涸必晝夜輪流以車涸水方可施工後有再歛者騎虎關大濟橋二段形勢所宜詳審焉至環城河七百餘丈皆民居一有火患瓦礫皆推入河最易淤塞此與督拆浮欄同爲緊要河工善後首事所宜隨時稟明地方官出示諭禁者也三賢祠馬頭灣泊之所最易停滯淤坭其都會渡頭卽築沙壩仍有餘沙溢出須防淤淺惟以河工善後租銀貯積典商於寒冬水涸時一疏濬之庶可以日久無弊河流順軌矣

城內之河須濬者有二道自北關入舊城遶學宮前南出水

關頭卽文溪也約共二百五十六丈自惠民門入新城內達大南門至水關頭合文溪水出騎虎關約共二百一十九丈此一道也又由清化關至宜民橋至北上橋等橋至五顯關共三百五十三丈此又一道也按舊志清化五顯兩關之水無橫闊丈尺而志謂關與橋可度故址未侵者可準查各橋鞏類一丈三尺河之舊址可尊者寬窄不一皆在一丈三尺之外又按舊志舊城濠闊三丈深七尺是河身尺寸可考而知也乃自萬厯初黃淳修志之時卽久已湮塞今則沿岸皆侵爲鋪屋甚如增嘉巷厰邊等處故迹盡湮每逢霖雨北門惠民門一帶水深數尺居民跼溺乾隆五年夏雨多潦水驟至北門居民廬舍皆被淹浸署縣王植署縣丞張煒等會集紳衿耆庶僉議捐貲公推紳士區有鳳莫之端謝名時聶者

輔劉洪憲何璋蘇枚許成漣李元標九人分任督工六房分
班隨辦牛肚司巡檢施有正典史王彬總理河務發給工價
畚插則募夫運工則僦船河中所搭舖舍及礙河小屋盡行
拆照舊址深以五尺至七尺爲率寬以一丈三尺爲率自閏
六月至次年六月工竣城內舟楫通行氣象一新第城內居
民稠密六關三河日久必復淤積善後不可無資適有詳銷
大鼇沙新承坦署縣王植議加工築俟成業收租善後商之
紳士但工費甚鉅旣無所出且成業亦須遲久區有鳳九人
惟蘇枚不願承墾餘八人願捐銀五百二十二兩繳縣生息
永爲修內河之用具詳批准接任知縣周紱以此銀屬在公
項事急挪支難以補復不如置買公產收租備用乃爲久圖
將生息銀發出買得源清四畝土名西甲洲冊載孫字七百